

青州府志卷五十三

傳五

僑寓傳

古之人非必輕去其鄉也從來奇人傑士往往蹤迹所至其父老傳爲美談而卽以爲是邦之人者有之或愛其山川之秀遂定居焉或官於斯土子孫不能歸或遭人倫之變避仇避兵擇地而託足遂埋骨焉然必其人之實有可傳其履齒所留足爲是邦增重然後居人稱之載筆者記之不然天下之隸農非必皆土著也何以泯然與草木同腐哉青州僑寓頗多名人然吾獨怪嚴光會稽人後漢書載其披羊裘釣於齊澤中而今但以嚴州爲子陵釣臺何也

漢

李解老子之子名宗宗爲魏將封於段干宗子注注子宮宮元孫假假仕於漢孝文帝而假之子解爲膠西王卬太

傅因家於齊焉

史記老莊申韓列傳

蒯通范陽人也曹參爲相禮賢下人請通爲客初齊王田榮怨項羽謀舉兵畔之劫齊士不與者死齊處士東郭先生梁石君在劫中強從及田榮敗二人醜之相與入深山隱居客謂通曰先生之於曹相國拾遺舉過顯賢進能齊

國莫若先生者先生知梁石君東郭先生世俗所不及何不進之於相國乎通曰諾臣之里婦與里之諸母相善也里婦夜亡肉姑以爲盜怒而逐之婦晨去過所善諸母語以事而謝之里母曰女安行我今令而家追女矣卽束緼請火於亡肉家曰昨暮夜犬得肉爭鬪相殺請火治之亡肉家遽追呼其婦故里母非談說之士也束緼乞火非還婦之道也然物有相感事有適可臣請乞火於曹相國迺見相國曰婦人有夫死三日而嫁者有幽居守寡不出門者足下卽欲求婦何取曰取不嫁者通曰然則求臣亦猶是也彼東郭先生梁石君齊之俊士也隱居不嫁未嘗卑

節下意以求仕也願足下使人禮之曹相國曰敬受命皆以爲上賓通論戰國時說士權變亦自序其說凡八十一首號曰雋永初通善齊人安期生安期生嘗千項羽羽不能用其策而項羽欲封此兩人兩人卒不肯受

前漢書本傳

舊志漢有毛莫如寓居東武從游王同魯伯之門按漢書施讐傳讐與五經諸儒雜論異同於石渠閣讐授張禹琅邪魯伯伯授太山毛莫如少路並無莫如寓居東武從游王同魯伯之文故略之

東漢

嚴光字子陵一名遵會稽餘姚人也少有高名與光武

游學及光武卽位光乃變名姓隱身不見帝思其賢乃令以物色訪之後齊國上言有一男子披羊裘釣澤中疑其光乃備安車元纁遣使聘之三反而後至除爲諫議大夫不屈乃耕於富春山

後漢書本傳

姜肱字伯淮彭城廣戚人也家世名族與二弟仲海季江俱以孝行著聞中常侍曹節等專執朝事新誅太傅陳蕃大將軍竇武欲藉寵賢德以釋衆望乃白徵肱爲太守肱得詔乃隱身遯命遠浮海濱再以元纁聘不就卽拜太中大夫詔書至門肱使家人對云久病就醫遂羸服間行竄

伏青州界中賣卜給食

後漢書本傳

青州府志卷五十三

三

趙岐字邠卿京兆長陵人也少明經有才藝娶扶風馬融兄女融外戚豪家岐常鄙之不與融相見仕州郡以廉直疾惡見憚永興二年辟司空掾議二千石得去官爲親行服朝廷從之其後爲大將軍梁冀所辟爲陳損益求賢之策冀不納舉理劇爲皮氏長會河東太守劉祐去郡而中常侍左悺兄勝代之岐恥疾宦官卽日西歸京兆尹延篤復以爲功曹先是中常侍唐衡兄玠爲京兆虎牙都尉郡人以玠進不由德皆輕侮之岐及從兄襲又數爲貶議玠深毒恨延熹元年玠爲京兆尹岐懼禍及乃與從子馘逃避之玠果收岐家屬宗親陷以重法盡殺之岐遂逃難四

方江淮海岱靡所不歷自匿姓名賣餅北海市中時安邱孫嵩年二十餘遊市見岐察非常人停車呼與共載密問岐曰視子非賣餅者又相問而色動不有重怨卽亡命乎岐卽以實告之遂以俱歸嵩先入白母曰出行乃得死友迎人上堂饗之極歡藏岐複壁中數年岐作扈屯歌二十三章後諸唐死滅因赦乃出著孟子章句三輔決錄傳於

世後漢書本傳

南北朝

高聰字僧智本渤海人也曾祖軌隨慕容德徙青州因居北海之劇縣聰生而喪母祖母王撫育之大軍攻尅東陽

青州府志卷五十三

四

聰徙平城與蔣少游爲雲中兵戶窘困無所不爲族祖允視之若孫大加周給聰涉獵經史頗有文才允嘉之數稱其美言之朝廷由是與少游同拜中書博士轉侍郎爲高陽王雍傅稍爲孝文知賞太和十七年兼員外散騎常侍使於齊後兼太子左率聰微習弓馬乃以將略自稱孝文銳意南討專訪王肅以軍事聰託肅願以偏裨自效肅言之於帝故假聰輔國將軍受肅節度同援渦陽聰躁怯少威重及與賊交望風退敗孝文怒死徙平州宣武未拜散騎常侍平北將軍明帝踐阼以其素附高肇出爲幽州刺史後拜光祿大夫卒贈青州刺史謚曰獻

北史本傳

成淹字季文上谷居庸人也自言晉侍中粲之六世孫祖昇家於北海淹好文學有氣尚劉子業輔國府刑獄參軍事劉彧以爲員外郎假龍驤將軍領軍主令援東陽厯城皇興中降慕容白曜赴授兼著作郎王肅歸國也高祖以淹曾宦江表詔觀是非乃造肅與語還奏言實時議紛紜猶謂未審高祖曰明日引入我與語自當知之及鑾輿行幸肅多扈從勅淹將引若有古迹皆使知之行到朝歌肅問此是何城淹言紂都朝歌城肅言故應有殷之頑民也淹言昔武王滅紂悉居河洛中因劉石亂華仍隨司馬東渡肅知淹寓於青州乃笑而謂淹曰青州間何必無其

青州府志卷五十三

五

餘種淹以肅本隸徐州言青州本非其地徐州閒今日重來非所知也肅遂伏馬上掩口而笑顧謂侍御史張思甯曰向者聊因戲言遂致辭溺思甯馳馬奏聞高祖大悅世宗初司徒彭城王勰曰先帝本有成旨淹有歸國之誠兼厯官著稱宜加優陟高祖雖崩詔猶在耳乃相聞選曹加淹右軍領左右都水仍主客令復授驍騎將軍加輔國將軍都水主客如故淹小心畏法典客十年四方貢聘皆有私遺毫釐不納乃至衣食不充遂啟乞外祿景明三年出除平陽太守將軍如故還朝病卒贈將軍光州刺史諡

曰定

魏書
本傳

劉休賓字處幹本平原人也祖昶從慕德渡河家於北海都昌縣父奉伯宋北海太守休賓少好學有文才仕宋爲兗州刺史娶崔邪利女生子文暉崔氏先歸甯在魯郡邪利之降文暉母子與俱入魏及慕容白曜軍至休賓不降白曜請崔氏與文暉至以報休賓又執休賓兄延和妻子巡視城下休賓答白曜許待厯城降當卽歸順密遣主簿尹文達向厯城觀魏軍形勢文達詣白曜詐祇候白曜令文達往升城見其妻子文暉哭泣以爪髮爲信文達回復經白曜誓約而還見休賓休賓撫爪髮泣復遣文達與白曜期白曜喜以酒灌地啟告山河誓不負休賓文達還

謂休賓可早決計休賓於是告兄子慰聞慰聞不可遂差本契白曜尋遣著作郎許赤彪夜至梁鄒南門告城上人曰休賓遣文達頻造僕射請降何得無信於是城內遂相維持欲降不得厯城降休賓乃出請命及立平齊郡乃以梁鄒人爲懷甯縣以休賓爲令延興二年卒

北史本傳

劉善明平原人鎮北將軍懷珍族弟也父懷民先世爲齊北海二郡太守元嘉末青州饑荒人相食善明家有積粟躬食饘粥開倉以救鄉里多獲全濟百姓呼其家田爲續命田少而靜處讀書刺史杜驥聞名候之辭不相見年四十刺史劉道隆辟爲治中從事泰始初徐州刺史薛安都

反青州刺史沈文秀應之時州治東陽城善明家在郭內不能自拔伯父彌之詭說文秀求自効文秀使領軍主張靈慶寺等五千援安都彌之出門密謂部曲曰始免禍坑矣行至下邳起義背文秀善明從伯懷恭爲北海太守據郡相應善明密契收集門宗部曲得三千人夜斬關奔北海族兄乘民又聚渤海以應朝廷而彌之尋爲薛安都所殺明帝贈輔國將軍青州刺史以乘民爲甯朔將軍冀州刺史善明爲甯朔長史北海太守除尚書金部郎乘民卒仍以善明爲綏遠將軍冀州刺史文秀旣降除善明爲屯騎校尉出爲海陵太守還爲後軍將軍直閣五年青州沒

虜善明母陷北虜移置桑乾善明布衣疏食哀戚如持喪明帝每見爲之歎息時人稱之轉甯朔將軍巴西梓潼二郡太守善明以母在虜中不願西行涕泣固請見許朝廷多哀善明心事元徽初遣北使朝議令善明舉人善明舉州鄉北平田惠紹使虜贖得母還幼主新立羣公秉政善明獨結事太祖委身歸誠二年出爲輔國將軍西海太守行青冀二州刺史太祖踐祚以善明勲誠欲與善明祿召謂之曰淮南近畿國之形勢自非親賢不使居之卿爲我臥治也代高宗爲征虜將軍淮南宣城二郡太守遣使拜授封新塗伯邑五百戶善明身長七尺九寸質素不好聲

色所居茅齋斧木而已牀榻几案不加剗削建元二年卒年四十九詔贈左將軍豫州刺史諡烈伯

南齊書本傳

李元護遼東襄平人晉司徒允之八世孫也允子順璠及孫沈志皆有名宦沈孫根根子後智隨慕容德南渡河居青州元護以魏平齊後隨父懷慶南奔仕齊位馬頭太守後爲裴叔業司馬帶汝陰太守景明初爲齊州刺史廣饒縣伯尋以州人柳世明圖爲不軌元護誅戮所加微爲濫酷州內饑儉表請振貸蠲其賦役但多有部曲時爲侵擾城邑苦之故不得爲良刺史也三年卒

北史本傳

庾導潁川人歷覽史傳善草隸書正光中除幽州左將軍

青州府志卷五十三

八

府主簿饒安令罷朝後客游齊魯之間天平中卒於青州

魏書附江悅之傳

李渾字季初趙郡柏人人也曾祖靈魏鉅鹿公父遵魏冀州征東司馬京兆王愉冀州起義遇害渾以父死王事除給事中時四方多難乃謝病爲青州征東府司馬與河間邢邵北海王昕俱奉老母攜妻子同赴青齊未幾而爾朱榮入洛衣冠殲盡論者以爲知機永安中除散騎常侍

北齊書本傳

楊弼字世弼北平無終人長於吏治仕魏爲輕車將軍後

周師入鄴弼隨齊後主南渡留居青州因家焉

山東通志

舊志南北朝有張烈已入雜記不復錄

唐

馬周字賓王博州茌平人少孤家窶狹嗜學善詩春秋資曠邁鄉人以無細謹薄之武德中補州助教不治事刺史達奚恕數咎讓周乃去客密州趙仁本高其才厚以裝使入關留客汴爲浚儀令崔賢所辱遂感激而西舍新豐逆旅主人不之顧周命酒一斗八升悠然獨酌衆異之至長安舍中郎將常何家貞觀五年詔百官言得失何武人不涉學周爲條二十餘事皆當世所切太宗怪問何何曰此非臣所能家客馬周教臣言之客忠孝人也帝卽詔之間

青州府志卷五十三

九

未至道使者四輩敦趣及謁見與語帝大悅詔直門下省

明年拜監察御史

唐書本傳

舊志唐有王義方李鼎二人義方本傳高宗以義方毀辱大臣左遷萊州府司戶參軍秩滿家於昌樂按唐書地理志昌樂屬魏州不屬青州舊志以義方家於昌樂竄入青州僑寓誤矣當從刪鼎已附人物傳李覺傳不復錄

宋

楊澈字晏如徽之宗人也世家建陽父思進晉天福中北渡海因家於青州之北海累佐使暮澈幼聰警七歲讀春

秋左氏傳卽曉大義周宰相李穀召令默誦一無遺誤穀甚異之年十八思進爲鎮趙從事會昭陽令缺使府命澈假其任時河決鄰郡府督役甚急澈部從數千經大澤中多蘆葦令采刈爲筏順流而下既至執事者訝以後期俄而葦筏繼至駭而 之澈以狀對乃更嗟賞建隆初舉進士時竇儀典貢部謂澈文詞敏速可當書檄之任調補河內主簿再遷青州司戶參軍

宋史附楊徽之傳

金

時茂先日照縣沙溝酒監寓居諸城紅襖賊方郭三據密州過其村居民相率迎之賊以元帥自稱茂先怒謂衆曰

青州府志卷五十三

十

此賊首耳何元帥之有方郭三聞而執之斷其腕茂先大罵賊不勝忿復剔其目亂刃剉之至死罵不絕詔贈武節

將軍同知沂州防禦使事

金史本傳

王用其先萊陽海滄人後徙壽光斟灌城用仕金以保障鄉閭官至鎮國上將軍知益都府事兼本路兵馬都總管

行元帥府事

舊志山東通志

舊志金有李庭已入人物傳不復錄

元

張仁義東安州人金末徙家益都及太宗下山東仁義乃走信安時燕薊已下獨信安猶爲金守其主將知仁義勇

而有謀用之左右國兵圍信安仁義率敢死士三百開門
出戰圍解以功署軍馬總管守信安踰十年度不能支乃
與主將舉城內附率其部曲從宗王哈坦平定河南授管
軍元帥後攻歸德飛矢入口折其二齒鏃出項後卒賜爵

縣侯

元史附
張禧傳

哈喇布哈

原作合
刺普華

伊爾特穆爾子也幼侍母鄂通氏居益

都嘗歎曰幼而不學有不墮吾宗者乎父時以斷事官建
牙保定哈喇布哈往白其志父奇之俾習輝和爾書及經
史記誦精敏出於天性李璫畔其母攜季子託里布哈避
地登萊間音問隔絕號泣徹晝夜繼從從叔薩奇蘇平賊

山東卒奉其母以歸薩奇蘇深加器重自謂其才不及言
於世祖召給宿衛出爲甯海路達嚕噶齊後遷江西宣慰
使未至官改廣東都轉運鹽使兼領諸番布帛時盜梗鹽
法陳良臣煽東莞香山惠州負販之徒萬人爲亂江西行
省命與招討使達實密討捕之先驅斬渠魁以訊馘告躬
抵賊巢招誘餘黨復業仍條言鹽法之不便者悉除其害
按察使託歡大爲姦利遂奏罷之羣盜歐南喜僭王號僞
署丞相招討衆號十萬因圖上其山川形勢及攻取之策
三十餘條遂與都元帥古爾班哈雅宣慰都元帥博索萬
戶王守信等分兵搃之未幾右丞索多督兵征占城交阯

屬護餉道北至東莞博羅二界中遇劇賊歐鍾等橫絕石灣其鋒銳甚哈喇布哈身先士卒且戰且行矢竭馬創徒步格鬪殺數十人勇氣益厲以衆寡不敵爲所執賊欲奉之爲主不屈遂遇害於心岡贈戶部尚書謚忠愍

元史本傳

明

蘇文蔚交趾清潭人永樂四年朝廷平其地文蔚慕義先歸授清潭縣丞九年考績稱最交趾復叛文蔚遂留京師宣德初改諸城縣丞因家焉

以諸城縣志及山東通志修

鞏宗玉莒州人正德間寓居諸城公冶長墓側墓圯宗玉力築之更爲建祠重門翼室繞以週垣日展拜其中卒至

青州府志卷五十三

十二

破家無以自給年且老餓死廊宇間縣人哀之葬於祠之

大門內

以諸城縣志及山東通志修

任茂令高密人寓居諸城萬曆四十三年大饑舉家流離母孟病卒於淮閱十三年茂令往返二千餘里負骸骨歸

一時會葬千人皆稱其孝

諸城縣志

房之騏字昇若順天人進士爲禮科給事中崇禎間以忤權貴罷職後起用督學山東升布政使以親老乞養占籍益都著蒲上間評山居雜誌掖垣疏稿麟旨定諸書

舊志山東

通志

劉世傑四川人寓居昌樂官至南臺監察御史

舊志山東通志

國朝

馬魯字習仲直隸雄縣人少孤有志行不苟同於俗補諸生喜聲譽結交燕趙間奇士少許可獨折節文安紀克揚相與辨晰古今嘗憤疾有司不以恤民爲心賦詩擬碩鼠譏刺時政兄之驪數相戒不改明末提學御史校士保定諸生畢集是時李自成已猖獗魯投巾於地罵曰誤天下國家皆是物也京師陷魯與大興梁以樟容城孫奇逢起義兵縛僞縣令郝丕績及自成兵敗西走復南渡獻策於史可法可法死還居唐縣

國朝順治三年來諸城結廬九仙山之陽與臧允德丁豸

青州府志卷五十三

十三

佳輩飲酒度曲時復大哭蓄一劍曰赤鱗未嘗去身尤好經術著春秋遵朱禮記節文道源一旨諸書又東航詩集

一卷文集一卷琴譜一卷

諸城縣志

金奇玉本姓朱江南崑山巨姓十餘歲遭家變出亡至諸城五蓮山僧金姓養爲子從姓金氏延明師教之仍以崑

山籍舉順天鄉試知澠池縣博學工詩畫著龍溪集

諸城縣志

姜國霖字雲一濰縣人寓居昌樂家貧以教讀爲業父卒於京師無錢市棺乃以蔽衣裹尸負之乞食以歸母性戇多怒怒則致疾國霖百計解之一日怒甚國霖跪膝前作小兒嬉戲狀強母掌其面母笑而罷其師周士宏卒於莒

國霖仿築室之義爲之廬墓嘗曰讀書只論語終身味之不盡自述所學云四十不以貧富撓心五十不以死生動

念
昌樂縣志